

# Imprenta at Librería ni J. Martínez

Cabildo 253 Intramuros, Teléfono 3283, P. Moraga 34-36, Teléfono 5005  
at P. Calderón 108, Binundók, Maynila.

**Ipinagbibili sa mga LIBRERIANg itó ang mga sumu-  
sunód na aklát sa wikang tagalog:**

## Búhay ni Aladino

- • Alejandro at D. Luis
- • Almanzor
- • Arturo, Lauro at Rosalio
- • Amáng si Jesús
- • Abecedario
- • Adán at ni Eva
- • Baldovino
- • Beatriz
- • Beata Maria
- • Bernardo Carpio
- • Bertong Laseng
- • Blanca Flor
- • Babaying Samaritana
- • Cabayong Tabla
- • Celira
- • Conde Urbano
- • Cricelda
- • Dama Inés
- • Diluvio Universal
- • D. a Marcela
- • D. a Maria sa Ahas
- • Doce Pares
- • Dr. José Rizal
- • Dr. José Burgos
- • D. Diego at D. a Juana
- • Doncella Teodora
- • Diego de Marcilla
- • Edmundo
- • Eliseo at ni Feliza
- • Eliseo at Hortensio
- • Esopo
- • Emilio
- • Felizardo
- • Fieles Amantes
- • Florante at Laura
- • Florentina
- • Floriño
- • Gonzalo de Córdoba
- • Gunlás
- • Graciano at ni Gaudencio
- • Huarán ng calinisan ng puri
- • Haring Astiero
- • Calabaza.
- • Saul at David.
- • Salomón
- • Ibong Adarna
- • Isabela
- • Jacobina
- • Jaime del Prado
- • José Vendido

## Búhay ni José Flores

- • Juan Bachiller
- • Juan at Maria
- • Juan Patáy
- • Juan Tiñoso
- • Juan Tamad
- • Juan Labuyo
- • Julieta at Romeo
- • Leopoldo
- • Ludovico
- • Landás na tuntunin
- • Ligaya sa Langit at Mundo
- • Manrique
- • Maria Merced
- • Mártir de Gólgota
- • Ntra Sra. de Antipolo
- • Panaginip ng pag-ibig (Comedia)
- • Perpetua
- • Pantinople
- • Principe Gimeno
- • Orontis
- • Ignidio
- • Oliveros
- • Pitóng Infantes de Lara
- • Proceso
- • Plus-Santorum 3 pangcat
- • Poncio Pilato
- • Reina Mora
- • Rodolfo
- • Rodrigo de Villas
- • Rolante y Claudia (Comedia)
- • S. Isidrong Magsasacá
- • S. Francisco de Sales.
- • Santa Ana
- • Eulalia
- • Regina
- • Elena
- • Sigismundo
- • Sofia, Teresa at Maura
- • Sagrada Misa
- • Santong si Moisés
- • Tablante de Ricamonte
- • Tatlong Número
- • Tatlong Personas
- • Tomás at Maria
- • Totoo at Sinungaling
- • Ulián ng Cabaitan
- • Urbana at ni Feliza
- • Villarba
- • Vivencio at Teofila

**Isang palaisipan: Biru-biru kung sanlan tamaan P 0.20**

TULÁNG KINATHA

— NI —

José Morante  
NA PINAMAGATANG

LANDÁS NA TUNTUNIN

— AT —

Dito'y matátausan ang LIWANAG ng  
nang-a-mulat sa KADIMLAN.



MAYNILA, 1918.

IMPRENTA, LIBRERIA AT PAPELERIA

— NI —

J. MARTINEZ

P. Moraga 34 36, Tel. 5005 P. Calderón 108, Cabildo 253 Intramuros.-Tel. 3283.



**TULÁNG KINATHA**

= NI =

**José Morante**

= NA =

**PINAMAGATANG**

**LANDAS<sub>NA</sub>TUNTUNIN**

= AT =

**Dito'y mátatausan ang LIWANAG ng  
nang-a-mulat sa KADIMLAN**

IKALAWANG PAGKALIMBAG

**MAYNILA, 1918.**

**IMPRENTA, LIBRERIA AT PAPELERIA**

**NI**

**J. MARTINEZ**

**34-36 P. Moraga, 108 P. Calderón at 253 Cabildo, Intramuros**

**TELÉFONOS 5005 y 3283**

---

---

Aring tunay ng *Imprenta at Libreria* ni J. MARTINEZ, at walang makapagpalimbág na sino man kung wala siyang kapahintulutan.

---

---



## Paunawà sa tanáng babasa

---

Manáng isang gabíng ako'y nag liliban sa makawiwiling liwanag ng Buan kaguiat nagunitâ ang pinag-usapan dalawang dalagang nagsasalitaan.

Pinangahasan kong ilagdâ sa papel ang lugód ng puso, at anong gagauin kung dí makatagal at kusang hapuin ang isip, sa gayong lawig ng baybain.

Bakit sa panahong ito'y nararapat na ang kahit sino'y magtaglay ng ingat sa gugol na pagod, at may munting linsád páasahan mo nang may kataling pintas.

Kaya sa tulâ kong mga itititik ang paunang samo, pantas na lilirip, huag paghanapan ng malasang tamis ang bubót na bunga ng unsiaming isip.

Kung sa pag basa mo'y may mapansing hindí tama ang sabi ko't sa isip mo'y malí, huag hahatulan ng sirá't ang hingi sa pagtutulin mo ay magwari-wari.

Sapaka't kung kaya gumugol ng pagál ang malampang isip kahit gumagapang, adhika ng puso'y maguing munting tuláy sa tawiring hirap niyaring abang búhay.

At kung wala ka mang mapupulong lugód  
sa bunga ng aking pinuhunang pagod,  
ito'y mabuti ring aliwan ng lungkot  
lalo't dinadalaw ng samá ng loob

Ihahangang dito't ang boong pasiyá  
ay nasasa iyo pantas na babasa,  
sa isasariwâ at ikalalanta  
ay naroroon din ang aking pag-asa.



# Punò nang salitâ

## Unang pankat

Sa isang baybaing libangan ng hapis  
na nasasakupan ng bayang Ercañés  
nayong ma-alindog na nakakaratis  
ng lansangang ilog sa alat na tubig.

Sa poók ding ito'y may isang bakuran  
na katuatua't dami ng halaman,  
kaya't sa bulaklak na inia-alay  
magtatamóng lugód ang matáng tatanáw.

Sa kalagitnaan halamanang ito  
ay mayroon namang marikit na kubo  
handang palamigan sa buan ng Mayo  
kun ang alinsangan ay sumisimbuyó.

Ditò ri't dí iba'y may himalang díkit  
na isang dalagang matalinong isip,  
anopa't sinoman sa makámamasid  
ay mahahalatang may lumbay sa dibdib.

Manáng isang dapit hapong makaraan  
ang dalawang tugtog sa pala-orasán,  
dalaga'y nanaog tangkáng maglilibang  
sa magandang kubong talagang aliwan.

Kapagdating doo'y biglang napahilig  
kasabáy ang taghoy luhang nag babatis  
jay amáng amá kol ang inahihibik  
gano't inulila ang anak mong ibig?



!Ay amang ama kong nagpalâ sa akin  
amáng nag alaga ng kay inang lihim  
dí ka na naawang iwan sa hilahil  
akong abang bugtong sa sintang pananím!

¿Saan magpupulót kanginong pagtanáw  
pipitas ng bunga ng iyong palayaw?  
wala na banta ko't hangang kamatayan  
ang pagpapalâ mo'y di na maduduláng.

At diyán sa iyong buhay na sinapit  
ay walang wala nang oras na tahimik  
at kulang ang aking luhang nagbabatis  
sa tindí ng dusa't bumubugsong sákit.

!Ay amang ama ko kung magunamgunam  
madlá mong pag-irog at pagpapalayaw  
ay wala nang langit yaring abang búhay  
kundí ang malipat sa payapang bayan!

Hangang naririto sa bayang malungkot  
at yaring búhay ko'y hindi nalálagot  
ay hindi titiguil ang luhang bubuhos  
sa hapdí ng aking nasasaktang loob.

!Hahanapin ko nang matagpô ang landas  
na pinagdaanan ng iyong pag lipat  
sa kabilang mundo't aanhing magluát  
ay walâ na akong amang lumilingap!

Sa mawika ito hinga'y nagka-buhól  
kaya nga't napatid ang masinsing taghóy,  
ay siyang pagdating namáng nagkataón  
katotong dalaga ng na sa lingatong.

Sa mamasda'y dagling nilugsót dinamá  
tinutóp ang noo't dibdí ng may dusa  
saka tinawagan, ang wika'y !Marcela!  
siyang pagka-ugpong nangiling hiningá.

Mata'y idinilat at saka nagturing  
—salamat, Dalmacia, at ikao'y dumating  
ako'y nakalimot at ang muláng dahil  
sa búhay ng aking amang guiniguliw.

Pinatáy sa maling hatol ng kastila  
ng dahil sa sumbong ng masamang dila,  
ito nama'y dina halos nawawala  
sa piling ng aking lihim na gunita.

Oo dí ko sana dapat na damdamin  
kun ang kamataya'y sa Dios nangaling,  
nguni't sa kánulo ng dilang Luciper  
galing pusong anak ang dí pupugnawin?

Kaya wala na nga akong kahilingan  
sa Dios kung hindi bawian ng búhay,  
pagka't ang malipat sa payapang bayan  
ay wala nang pusong marunong mag damdam.

Kaya nga, Dalmacia, ako'y nag a-agap  
guiliw na kapatid ng pag hinging tauad  
sapagka't dí natin talastas ang oras  
ng kamatayan kong di na magluluat

Sa mawika ito Dalmacia'y nalugmok  
nalaglág ang luha't nag buntong himutok  
walang katuirang nagpapahintulot  
na sa dalamhati búhay mo'y matapos.

Magwari-wari ka't tingalin ng isip  
ang pagkalarawan ng santong matuid,  
na ang lumalabag sa dunong ng Langit  
ay walang wala nang aantaing bihis.

Pawi ang lumbay mo at ipaubaya  
sa Dios na Amá ang boong bahala,  
walang mangyayari sa tahanang lupa  
na hindi sa dunong niya nagmumula.

Lisan ang pighatí at alalahanin  
yaóng hulíng búhay nating lilipatin  
dito'y walang utang na maitatákuil  
sa Dios na hindí daratnán rē singil.

Kung katotohanang nagbuhay sa upat  
búhay ng tatang mo ang pagka pahamak  
asahan mo Selang hindí magluluat  
darating ang ganti, oras na katawát.

At doon sa iyong hangád na mādali  
ang búhay mo't dahil sa laking pighati  
iyong pagsisiha't baka maguing sanbí  
ng dí pagkakamit Bayang Luwalhati.

Sukat hangang dito, giliw na kapatid,  
dí naman pag-aral at pag-unang bait,  
iyong pagpilitang iwaká ng isip  
ang pighating laban sa Santong matuíd.

Walang nararapat kundí ang umayos  
sa kapangyarihan ng lumik-hang Dios  
sanlibo mang ama ang siyáng matapos  
ano't daramdamin sa Langit na tulót?

Pusong malulunod sa pighati't lumbay  
sa laglág ng payo'y kusang nanimbulan,  
sa oras ding yao'y ipinagwaksihan  
ang katalong sindak na kinakalaban.

—Salamat sa iyo Dalmacia kong kasi  
sa pagpapala mo't guinawang sakbibi  
at kulang ang aking dilang magpupuri  
sa dapat kilanling lubos mong kandili.

Na dahil sa iyong payo't pag-aampon  
ligalig ng aking puso'y huminahon  
kung dí mo dinatnán, banta ko'y nagtulóy  
yaring abang búhay sa pagkakabuhol.

Nguni ang hiling ko'y isang kasayahan  
na makapapawi sumimot ng lumbay  
—oo nga Marcela't ang lahat ng iyan  
sa araw ng bukas ay magagampanan.

Nguni tulutan mo na kita'y lisanin  
si ama't si ina'y inip na sa akin  
at baka ano nang kanilang isipin  
magma kangina ng di ko pagdating.

At buked sa rito'y dapat ipagsabi  
sa sintang ina mo, bagay na nangyari  
at baka sakali na sa dakong huli  
ako ang patalba't buntuhan ng sisi.

Di ligaw na balak, Dalmacia, kong mutia  
nguni at ako rin ang sumasangsala  
sapagka't ang lumbay na gumagambala  
ay wala na't ngayo'y lubos na payapa.

Kaya huag mo nang hatdan ng balisa  
ang dibdib ng aking minumutiyang ina  
at yaon ay isang makadragdag pa  
sa pighating dulot ng pagkaulila.

At huag mo sanang lisanin ng bigla  
akong bagong bagong ahon sa dalita  
—Marcela'y bukas na tayo magpasasa  
ng balabalaking magbibigay tua.

Kay ama't kay ina ang gagawing sanhi  
na kitang dalawa'y dito mananahi  
kaya paalam na't iwaksi ng budhi  
ang labag na iyong pagdadalamhati.

Paasahan mo nang sa araw ng bukas  
bilang na iisa ang tugtog ng oras  
magbabalik ako't nang upang magluat  
sa kubo ring ito kita mag-uusap.

—Maraming salamat kapatid na irog ako sana'y huag makanlong sa limot kung may búhay lakás naman ay mag-utos at sa makakaya'y nahahandang lingkod.

Abo't ang kamay ko't kita'y magyakapan hagkan muna kita't, ako nama'y hagkán maguing tandang saksi ng pagmamahalan at sa tipáng oras kita'y ina-antay.

## Ang pagbabalik ni Dalmacia

### Ikalawang pankat.

DALMACIA.—Narito na ako Marcela.

MARCELA.—¿Komusta?

DALM.—Mabuting awa ng Dios, walang ligangam na anomán, itinanóng sa akin na kun bakit ako naluatan kahapon, ang naging sagót ko'y nagkawili lamang kita sa pag-uusap, na kun anó ang mabuting sukat isiping paghahanap búhay; sa sagót kong ito'y nalaglag ang kanilang luha at ako'y niyakap na pinakahigpít ng aking iná, at ang idinugtong na pangungusap naman nang aking amá ay ganito Pakin- gan mo at aking kakantahín.

MAR.—Oo nga, ang damdam ko'y makaliligaya.

Oh bunsong ligaya niyaring aming dibdib  
bulaklak ng tua't bunga ng pag-ibig  
iyong halamanin sa lináng ng dibdib  
itong tagubiling aking ihahasík.

Unang una bunso'y tibayan ang loob  
ng mga pag-asa sa totoong Dios  
at ang ikalawa'y huag kang lilimot  
ng mga pagtupád sa banál na utos.

At ang pagka-awa sa kapua tawo  
huag lilimutin, Dalmaciang anak ko,  
at yaón ang binhíng pag-aanihan mo  
sa kalilipatang huling Paraiso.

Ang lahat ng aking mga tagubilin  
bunsó sa dibdib mo ay papagtibain  
at ito ang gabáy na guguyabinín  
hangang binibig-yan ng búhay na angkín.

Ikáw aming bunso'y magpapakatimbang  
sa lakad ng mundo't panahong niniral  
kung sakasakali't makapag tagumpay  
payapa ka rito't hangang hulíng búhay.

Sa mundo'y pag di ka natutong nangilag  
at dí tinalasan ang mata ng ingat  
walang malay-malay nayapos ka't sukat  
niyaong panganyayang lihim na pahamak.

Ang parang kapatid na pagsusuyuan  
bunsó ko, Dalmacia'y pailagilagan,  
sapagka't ang lihim niyang kalooban  
ay di mo talastas ang patutunguhan.

At huag ka namang magpapakaniig  
sa may asawa na ng pakikipanig  
sapagka't kung minsa'y pinapagdurungis  
ng palabintangin ang puring malinis.

Sukat hangang dito, Dalmacia kong guiliw-  
tanáng mahalagang aking tagubilin,  
sapagka't ang takda nitong búhay natin  
ay di natatanto oras ng pagdating.

✓ Yaóng ating bukid kung ako'y manaw na  
ihanap ng tawong marunong magsaka  
na may sadyang bait na nak kilala  
nang di ka dalawing ng pagkakasala.

At ang magsasaka, Dalmacia'y ganoón  
marami ang mga ... liban sa dí gayon;  
ang hahanapin mo'y ang tawong marunong  
magmahal sa puri't may sariling hatol.

At kung may panira namang ihahatid  
na dinadaya ka sa ani ng bukid  
ay magpakunua ng malaking galit  
nang may kamtang tuá ang may dalang inguit.

Sapagka't ang hangád ay iyong bawiin  
sa mabuti't siyá ang papagsakahin,  
ito'y asahan mo't kung ga sa patalim  
ay lalong matalas sa samáng gagawin.

Hangang dito bunsót kung бага sumapit  
oras ng búhay ko't sa mundo'y pag-alís  
ay di kailangang iyong ipa-dapit  
lalo't kapurihán ang nasa ng dibdib.

Huag na dí lamang mabaón sa hukay  
ang kaawa-awang lupa kong katawan:  
sa mawika ito nalaglág na namán  
ang luha't gayari ang hulíng tinuran.

Katiwala kami ng iyong paglipat  
doon kay Marcela, pagka't sa hinagap  
kun bagay sa tibay hindi naman sukat  
magagaping daglí ng may lilong hangad.

Hangang dito Sela't siyang pagkatiguil  
niyong sa kay amang mga tagubilin  
anaki sumilang ang mga bituin  
at naliwanagan isip kong madilim.

DALMACIA.—¿Anó бага Marcela ang lasáp  
mo sa mga tagubilin ng aking amá?

MARCELA.—Makaliligayang mga pangungu-  
sap na dapat halamanin sa lináng ng  
malinis na pagtupád at papamunga-  
hin ng bungang dapat iyalay ng sino-  
mang tawo sa banál na hiling ng  
Santong matuid: mabuting amá at  
nau-ukol pakamahalin ng isang irog  
na anak; datapua't makalalansag sa  
dibdib nang may pag sintang anak sa  
giliw na ama.

DALM.—Ah oo nga, tunay ang iyong  
turing, at ibinabalita ko sa iyo nga-  
yon, na noóng inilalaglag ng aking  
amá sa pangdingig ko ang butil ng ma-  
gandang aral, ay tunay na sa balang sabi,  
ay nak kibagay ang paták ng mata-  
mís kong luha na ito'y ibinabalong  
niyaong guniguní, na paano kaya kung  
dumating ang panahon ng aking pag-  
kaulila. ¿Gaano kaya ang dami ng ka-  
kabakahin kong digmá ng hinagpis?  
Sa banta ko'y di matatantusan at ma-  
pipilitang ilugmók sa ipagdaramdam  
ang magkaroon man ako ng matigas  
na puso at alipala'y di na mangyaya-



ring sapitin ko pa ang ako'y maiwan at ligaya ko na sa oras na yaon ang ako'y masama sa lupang mapalad na kalilibingan ng irog kong amá. Hangang dito Marcela ang nangyari sa oras na ako'y pinangangaralan; nguni't pinapansin ko sa iyo ngayon, na ¿kun bakit magmula kanginang ako'y nag-sasalita, ay nakikisabay namán ang pagdaloy ng iyong mga luha sa mata?

MAR.—Ay Dalmacia! ¿Aling puso ng may pagsintang anak ang dí bubug-suan ng paghihinagpis at manariwang mulí ang nalalantang puno ng pighati? ¿Ay amang ama no! ¿Saan ka naroon?

DALM.—Marcela, maghusay ka nga ng loob at maala-ala ko pala'y kahapon ay humihiling ka sa akin ng isang kasayahan, ngayon ay wala naman maiya-alay sa iyo kundi isang maikling kundiman.

MAR.—Tunay nga ba? Salamat Dalmacia kun gayon ang kinasasabikán kong kanta mong kundiman at upanding makaputol ng muling nag usbong kong kalumbayan, at kun magka gayo'y asahan mo namáng may kapalit akong kákantahín sa iyo.

DALM.—Ganoón bá?

MAR.—Oo.

DALM.—Kun gayo'y pakingan mong magalíng.

---

Oh! mga bulaklak ng nagtayong kahoy  
at ikaw amihang malamig na simoy  
magbalita kayo ng aking pagtaghoy  
sa kinalalag-yan ng ihihinahon.

Kayong sarisaring ibong lumilipad  
at ang palay palay na hanging habagat  
ibalita ninyo ang daing ng hirap  
sa kinalag-yan ng ipapanatag.

At dí maglulubay ako ng pagluhog,  
kahima't dalita ang awang ihulog  
ay di mag sasawa ako ng pagpulot  
at ituturing ding ligaya ng loob.

Halihalimbawang maguing takdang guhit  
ng kamatayan ko ang sa pusong nais  
ay ituturing ding ligaya ng dibdib  
lalo't mahalatang nagdadalang hapis.

DALM.—Tapós na Marcela ¿Anó bagá  
ang dingig mo?

MAR.—Marikit na pagkayari Dalmacia  
ang kundiman mong iyán ¿Sino bagá  
ang may gawa ng kathá?

DALM.—Hindí ko masabi sa iyo, sapag-  
ka't iyán ay narinig ko lamang sa  
isang taga.....

MAR.—Banta ko'y isang pusong naka-  
lutang sa maalong dagat ng karalitaan,  
na ang inahihibik ay mapasampa sa  
pampang ng katiwasayan.

DALM.—Tila nga; datapua't maala-ala ko  
pala'y ¿di бага ang wika mo kangi-

na'y pagkatapos ko ng pagkantá ay ikaw naman?

MAR.—May nasubukan ka na ba?

DALM.—Wala nga, nguni't baka mo malimutan.

MAR.—Kailan ma'y kawangis ng guinto ang aking pangako, at nang makilala mo'y iyong panaingahan.

\* \* \*

Sisimulan ko na, kapatid na guiliw ang kantang kundimang iyong hinihiling di anhi'y may dagat, na hayag ma'y lihim mababaw ay hindi matarok ang lalim.

Sa dalang hiwaga ng nasabing dagat di man matákahin ay manguiguilalás bató'y lumulutang na sakdal ng bigát at ang lumulubog ang magaang patpát.

At ang mga isdang naglisaw sa tubig makaliligayang malasin ng titig balang malalaki'y may tibong matulis at ang balang munti ni walang palikpik.

Kaya nga at walang pangambang sagpangin at hindi gunita na makahihirin, datapua't kung minsa'y nabubulunan din kapág ang sisilá'y panahong sasamin.

At sa dalampasig ng nasabing dagat sabihin ang dami ng batong nagkalat ang katakata't kaguilaguilalás munti ma't malakí, magkakasing bigát,

Sa kalaguitnaan ng dagat ay gayon  
ang sabi, mayroong mataás na kahoy,  
sanga'y malalabay, daho'y mayamungmong  
na nakalililim sa dagat na yaon.

Sa puno ng kahoy tubig na nunukal  
walang kasingsaráp at sakdal ng linaw  
at sa dakong dulo'y kung anong dahila't  
bibihirang tamís ang mánanamnamán.

Ihahangang dito Dalmaciang kapatid  
ang kantang kundimang nahiling ng dibdib  
yao'y malaon na sa tandaang isip  
boong kahuluga'y di ko nababatid.

—Marcela, ang iyong kinatang kundiman  
panahong kastila ang tinatamaan  
kung ngayo'y hindi na, at ang umi-iral  
balang may matuid ang ina-ayunan.

Gayón man Marcela'y palalamnán ko rin  
dagat na mababaw ay sakdal ng lalim  
yaong kababawang ipinagtuturing  
ang asal ng tawong natatanaw natin.

At ang kalalimang hindi matatarok  
ay ang libim nilang nangasasa loob  
at ang mga batóng hindi lumulubog  
ang sa mayayamang katuirang buktót.

Ang hindi pag lubog ay nakakatigan  
ng panuyo't suhol ang kapangyarihan  
kun ngayo'y wala nang pusong magdaram-dam  
at ang naghahari'y Santong Katuiran.

At ang lumulubog na magaang patpát  
ay ang katuiran ng tawong mahirap,  
hindi palutangi't dahilán sa bigat  
niyaong naglulubog na pabatong pilak.

Sinasabing isdang nag lisaw sa tubig na ang malalaki'y may tibong matulis, masamang mayaman na ang ini-isip sa búhay ng dukha'y umapit manlupig.

Isdang maliliit sa aking palagay dili iba't tayong maralitang búhay kahit may matuíd, ay napipilan ng masigláng lakás niyaong kayamanan.

At ang punong kahoy na sakdal ng tayog ang Pamahalaang ating sinusunod sangáng malalabay ang nakalulukob na kapangyarihan sa lahat ng sakóp.

At ang sinasabing tubig na nunukal sa pune ng kahoy ay sakdal ng linaw, ang tapát na hatol na dí nasisinsay sa Santong matuid ng kapangyarihan.

Sangáng maliliit ng nasabing kahoy ay ang mga Juez, Kapitan at Hukom na ang karaniwan ay nagsisihatol ng dí karampata't dahilan sa suhol.

Na kapag hinatdán ng pabangong suob at ng sarisaring maligayang handog ay tulad sa bakal nana palalambot at nailalagay sa ibiguing hutok.

Ang matang malinaw ng Santong matuid kusang binubulag dahil ng pag-ibig sa pilak, at di na halos ini-isip ang kahihinatnán sa huling sasapit.

Sinasabing batong magkakasing timbang muntí sa maléki ang bigat at gaan ang tawong nibkha sa aking palagay guinoó ma't dili iisa rin lamang.

!Ay mundo! !ay mundo! kailan pa kaya  
ang ipag babago ng asal mong sama?

—Dalmacia'y malí ka ng pag-uunawa  
ang mundo'y talagang bayan ng dalita.

Sa mundo'y kung walang ipagpipighati  
ay dapat tawaguing Bayan Lualhati,  
kusang tapatin mo't kun sa aking wari  
mundo'y parang batong kinukunang uri.

Ng sa Dios Amá bagáng pagmamasíd  
sa balang may pusong wagas at malinis  
sa kaniyá ay laan ang payapang langit  
at sa pag durusa ang balang may dungis.

Kaya ang sinoman kung sa ganang akin  
siyá ang bahala sa ibig puntahin  
dalawa ang landas, datapua't bilin  
huag pakaliwa't kanan ang tunguhin.

Lansangang kaliwa ang hindi pagsunód  
ng tawo sa bilin at utor ng Dios  
nag papakahimbing sa biyaya't lugód  
na dí dinadalaw ng gunita't takot.

At ang daang kanan ang hindi paglihís  
sa utos ng Dios na bigay kay Moisés  
ang magsipanuto doo'y magkakamit  
niyaong lualhating walang kahulilip.

Dangan nga kung bakit at di mágawian  
ng tawo sa mundo ang muntá sa kanan

—Marcela'y bihira't kun magkaroon man  
ay di naghahangad ng dangál at yaman.

Pagka't mahaba nang panahon kapatid  
ang dito sa mundo'y aking pagmamasid  
ay wala pang tawong hindi nag-iibig  
ng yama't sa puri tingalín ng labis.

Kun ang mga sadyang kunó ay ulirán  
na sasalamín ng nangamamayan,  
ay nangag bibilí ng di karampatan,  
niyang tindang sangkap sa pagka binyagan.

Hangád sa pagyaman kaya lumilihís  
sa totoong landas ng Santong matuid  
ito'y siyang saksing dapat kunang linis  
ng nangádayang ating pag-iisip.

Kaya marami na ang ibig bumitaw  
sa pagka romanong dating kinaguisnán  
dahil sa halata na kinakalakal  
ang religiong itong kalinislinisan.

Ay manong ang aming paumanhing hibík  
ng dí mabalisa kaming dating kabig!  
magpakitang loob at huag lumihís  
sa katotohanang landas ng matuíd.

Di bakit si Cristo niyaong nabubuhay  
guinugol ang pagod hirap kamatayan  
sa sang mundong tawo ay iniaalay  
ang ganáp na awang dí hangad sa yaman.

Ang ugaling yao'y gaha't di mangyari  
sa nangáritong kuno'y kahalili  
ni Cristo, ay bakit hindi bigyang saksi  
ng katotohanang pagkamakandili?

Hindi't ang lagui naming namamasdan  
ang kalakhang anyó sa nangamamayan  
lalo't walang limos ang dukhang namatay  
ni hindi na nila ibig bendicionan.

Sa bagay ang isang tawong ililibing  
bendiciona't dili yao'y iisa rin  
at wala nang daang baguhi't sirain  
hatol ng Justiciang tapát na maglining.

At kun ang bendición ang hagdang pagpanhik  
sa pinagnanasang bayang matahimik  
ay dí sana nila dapat ipagkait  
yaong katungkulang ipagkakalangit.

Pagka't sila'y mga laáng mapagkukup  
timbulan ng sala't ng hindi malunod,  
ay bakit sa dukhang walang mailimos  
ang bendición nila'y ipinagdadamót?

Dito'y mababalak na ang pagkáukol  
sa langit ng tauo'y hindi sa bendición  
kun hindi sa linis ng puso naroon  
ang ikararapat sa Dios na Poon.

Sapagka't ang handang maligayang langit  
ay hindi sa libing ang ipagkakamit  
kung hindi sa gawa't wagas na pag ibig  
sa Dios ang ating hagdan ng pag panhic.

Gawang kamangmangan ng linahi natin  
balabaling puri ang dakilang libing  
gugulin ang pilak sa walang hihinti't  
ang tinatasaha'y bibig sa pagkain.

—Dalmacia'y hintay nga't di na makatiis  
ako sa lahat mong ipinagsusulit  
ang lahat ng yao'y ano't nababatid  
ay isa ka lamang tubong taga bukit?

—Tama ang sabi mo kapatid na hirang  
na yao'y hindi ko dapat maalaman,  
nguni't ito'y mga dunong na palagay  
na higuít sa Pari ang pinag aralan.

Ako naman ngayo'y lubós ang tiwala,  
pagka't siya nilang mga guinagawa  
ang magpakahigpit, at ang pagka-awa  
sa kapua tawo'y walang mahalata.



Ugaling kastila'y dí binibitiwan  
ng mga Clerigong dito'y nangaiwan,  
batang bagong anak na pabibinyagan  
mag rerecargó na'y wala namang utang.

Sa bayang Pulilan ang lalong masakláp  
sangsalapi't walo ang singil sa binyag,  
yao'y tubig manding sa Jordang nagbuhat  
kaya't mahalaga ang naguíguing bayad.

Kagagawang yao'y ¿sino sa may isip  
ang dí susungkuin ng paghihinagpis?  
at mapipilitang isigaw ng hibik  
ang mga paghamak sa wastong matuíd.

Dito mamumulos ang paghihinala  
na dí naman ganong sala ang magdaya  
sapagka't ang mga may hawak ng tanga  
sa bawal ay siyang unang gumagawa.

Akong nagsasabi hindi protestante  
at sa romanista'y lubos ang pagkampí,  
nguni't hindi kayang bathing kong mangyari  
na ang hindi tama'y siyang manatili.

Paris ng ugaling guinagawa ngayon,  
ng maraming Pari, liban sa di gayon,  
¿kung anong dahilan at pinasusuhol  
ang may namatayang nagpapa-ataul?

Ito nama'y hindi nagbigay gambala  
sa kanila't tulong lamang ng may awa  
¿alin katuiran ang nagpanukalang  
mag multa ang walang salang guinagawa?

¿Ang santong religion бага ang may halál  
ng ganoong mga palakad sa bayan?  
sa banta ko'y hindi at ang kabanalan  
ay dí nagnanasang mag imbot ng yaman.

Kung sa bagay amin namang natatatap na kayo ay walang ibang paghahanap at may ilang tawo na kinakagawad na nangagaaantay ng ano pang bayad.

At saka ang Pari nama'y may gutom din na nagkakagugol tungkol sa pagkain, dahil kaya roo'y di na salang hingin ang labis na bayad sa takdang arancel?

¿Ito kaya'y hindi kusang pagsalansang sa linis ng utos ninyong sinumpaang

ó baka sa amin lamang nababawal at sa mga Pari hindi kasalanan.

Nguni at ang inyo namang nakikita sa bayad ng Bayan ay labis labis na may dakilang libing, kasál at binyag pa may pamisa't saka sarisaring pista.

Ito nama'y pawang pinagbabayaran ng di naman mura't sa halagang mahal, yaon sa wari ko ay labis na naman aywan sa mga may hangad sa yaman.

Ang lahat ng ito ay dapat damdamin ninyo't mawiwikang kulang ng pagtingin —oo ang sagot ko, nguni't pagwari-in na ang nangyayari ang dapat sisihin.

Dili бага kayo'y ilinagdagang pastol sa tanang alaga'y makapagtataboy sa sawing kalinga ay nangagsilaboy at sa ibang sexta nasok napa-ampon.

At ang katurang isinasalita ang sila ay walang aantang pala balát-kayong banál, buting pakunuwa sa bulág na wari umang na paraya.

At kung kaya kayo'y Kurang nangatanghal  
na pinipintuho sa lahat ng Bayan  
dugo't, búhay hiras nami'y pinuhunan  
saka ngayo'y wala munti mang pagtanaw.

Bagkus pang pahiras siyang ginagawa  
sa búhay ng mga tawong maralita  
ang limos sa patay na dating mababa  
ngayo'y tinaasa't hindi mapaghaka.

Anong dahil kaya ng sumasa-isip  
kabuhayan nila'y hindi naman guipít?  
yao'y nau-ukol sa tawong balawís  
at hindi sa mga sálamina bait.

Ang ganitong sabing pawang masasaklap  
di naman mangyaring mabig-yan kong salága  
sa pagka't di lihim at natatalastas  
ng madlá, ang inyong hindi pagtatapat.

Dahil dito'y siyang sanhing nag-aakay  
ng pagkabalisa sa kinamulatan,  
sapagka't ang landas na talagang daan  
ng santong matuíd ay linilihisan.

Ano pa't kung aking págunamgunamin  
sanhing nagbibigay guló ng panimdim  
kung ano't sa mga ulirang susundin  
doon tumutubo ang PUNO NG DILIM.

Ito sa dibdib ko ang matinding bikik  
at dahil ng aking luhanag naguiguilid  
kahimawari'y magsipanumbalik  
ang nangáliligaw sa Daang Matuíd.

Upangding kung tayo'y magka-ayos-ayos  
sa pagkaka-sundo't magka-isang loob,  
magbangon ang ating Inang nakalugmók  
sa nadustang búhay na kulunos-lunos.

At dí mangyayaring itulot ng langit  
yaóng Kalayaang ninanaisnais  
hangang naghahari ang kuhilang isip  
sa atin, at saka ang ugaling inguít.

Ganito ang siyang kutóg niyaring loob  
hindí pangunguna ng dunong sa Dios  
Marcela'y hingi kong bigyan mo ng sagót  
kun ang palagay ko'y hindi náaayos.

—Dalmacia ay tama ang iyong palagay  
aywang sa lalong pantas na magnilay  
na dí itutulot yaóng Kalayaan  
sa kulang ng wasto't walang kahusayan.

Nguni gano bagang iyong napapansin  
at magulong bayan ang ipinagturing?

—Marcela'y hindí mo pala nalilining  
daming nag-iibig Punong kilalanin.

Pinangugugulan ng pagod at pilak  
ang kilanling Puno't sa Baya'y matanyag  
—Dalmacia'y dí natin mabibig-yang sukat  
ang lihim ng puso nila't hinahangad.

At sakasakali na ang na sa isip  
nitong sumasagui sa pag-uumibig  
ang makapagsabog ng malasang tamís  
níyaong maligayang bunga ng tangkilik.

*Ang pag-alis ni Dalmacia*

Paalam na mutia't lilisanin irog  
ang mga titig mong ligaya ng loob  
—oo datapua't huag isalimot  
akong kapatid mong nahahandang linkod.

O kun dili kaya ay dito na kita  
matulog at bukas muwí ng umaga  
—Huag na't sakaling baka kumutog pa  
ang kung ano't ano kay ama't kay ina.

Adios Marcela.—Dalmacia,y matnubay  
sa iyong paglakad ang kapayapaan  
—ako ma'y gayondin, búhay mo'y ingatan  
sa gabing pagtulog ng Angel na bantay.

Na huag ka nawang dalawin ng init  
hanging nagbubunga samang panaguinip  
—ako ma'y gayondin ang taguring hibík  
abót ang kamay ko't magdaop ng dibdib.

Aalis na akong lingon ka ng tanáw  
titig ko Dalmacia ay pumapatnubay  
malayong adios,—adios din namán  
lupít ng sakuna ay magpakundangan.

Ang pagbabalik ni Dalmacia ng ki-  
nabukasan

### **Ikatlong pankat**

Narito na ako—Kita nama'y antay  
ganong búhay ninyo kagabing nagdaan?  
—Sa awa ng Dios ay walang ligamgam,  
kanginang umaga'y tumangap ng liham.

Na ang sinásabi tungkol sa pag-ibig  
padalá ng isang binatang matalik  
ng tinatahak na ng aking panitig  
mahambal ang dating matipid kong dibdib.

Na dahil sa hibík na kalaguimlaguim  
nitong nagsasabing kinatawan papel  
narito Marcela at iyong basahin  
ikaw man banta ko ay mahahambal din.

Ohól! at kung gayon ay makadudurog  
ng pusong matigas ang haing pag-luhog?  
—Narito Marcela't sa kamay ko'y abót  
ang makababaklang daing ng pag-irog.

Babasahin ko na, kapatid na guiliw  
ang pag-sintang mana sa linahi natin  
huag mababaklá ang iyong panimdim  
sapagka't ang mundo'y lubhang sinungaling.

*Palasinta ng binatang si Constancio*

Poon ng pag-irog huag maguing sawí  
ang hibík ng pusong na sa sa pighatí  
sapagka't ang sinta'y walang hinihingi  
kundi ang lingap mong ilulualhati.

Kaya huag mo po sanang ipagkait  
ang lunas na awa sa aking pag-ibig  
kung nasasadhán man ang pinto ng dibdib  
bukis't salubungin ng iyong tangk'lik.

Yayamang sapagka't ang iniluluhog  
sa mga yapak mo'y banál na pag-irog,  
tipid ng bighani mo po'y malamuyot  
na isakandungang ng lingap ang lingkod.

Papagkamting palad ang sa pusong hibík  
na ikaw ang maguing ligaya ó Langit  
ng dustang búhay ko't magpahangang guhit  
ay paglingkuran kang kábiyak ng dibdib.

*Nang matapos nang basahin ni Marcela  
ang padaláng sulat ni Constancio*

—Nákilala ko na ang saráp ng daing  
ng nag-u-umanong puso sa pag-guiliw,  
ikaw ang bahala nguni't pag-isipin  
ang pang adyang dapat sa huling daratnin.

Sa lakad ng mundo'y panahong niniral  
ang isang paris ta'y sukat katitimbang  
ang lalong matatág ay nangahahapay  
sa dunong ng isip nilang mapanglinlang.

—Tama ang sabi mo kapatid na liyág  
na tayo sa mundo'y sukat kaí-ingat,  
nguni't sa warí ko'y hindi masasalág  
kapagtalagá nang tadhana ng palad.

At may matatandang nagsisipagsabi  
at sampo ng áklát ay namamarali,  
tawo sa anomang bagay na mangyari  
yao'y katutubong taglay sa paglakí.

Dalmacia kung tungkol sa sinabi mo'y  
hanapin nga natin ang pagkatotó  
ng isang nangyaring dí anhi'y ganito  
na ang nagsasabi ay Novelang libro.

Kunó ay may isang priñcipeng mesiglá  
nagtanong sa lalong pantas ó bihasa  
ang wika'y turan mo na kung sino bagá  
tungo ng palad ko sa pagaasawa.

Sagót ng tinanong—priñcipeng marangal  
ang takda ng iyong daláng kapalaran  
ay babaying pangit at dí dugong mahal  
yao'y asahan mo't siyang káraratnán.

Ang dalagang ito'y isang fonda-dista  
walang hanap búhay liban sa magtinda,  
anitong principe—saan lugar бага

—Ay na sa sa libis ng tuláy ng quinta.-

Kung gayon ay ating saglít na parunan  
ang tungo ng aking dalang kapalaran  
at tatayahin ko kung may karampatang  
masukob sa lilim ng taglay kong dangal.

Yaon na't sa quinta nang sila'y dumating  
itong fondadista'y itinurong libim  
hindí iba't iyan, princípeng butihin  
ang takdá ng iyong kapalarang angkin.

Ako'y aalis na't ang bahala'y ikaw  
mag-isip ng lalong kagaling-galingan,  
nguni' ang hula ko'y hindi mabibigyan  
ng litis, at yaon ang pangyayarihan.

Pinagmalas nanga't pinag-isip-isip  
ang maguiguing kasing kabiya ng dibdib  
ay walang makitang ipagkakalangit,  
nagbuntong hininga't luha'y bumalisbis.

Diyata't ang dugong sa korona galing  
hamak na babae ang kakasamahin  
dustang kapalara'y nang diko tangapin  
mag-isip ng lalong nararapat gawin.

Nang hindí mangyari ang takda ng palad  
putlín ko ang ulo't yaon ang marapat;  
linapitan na nga't liig ay tinigpas  
nitong walang malay sa pagkapahamak.

At ipinatapong madali sa ilog,  
anopa't tinanga'y ng matuling agos,  
sa nangyaring yao'y sabihin ang lunos  
ng nangaroroong matáng nanónood.



Pinatay at sukat wala namang sala  
ang kahabag-habag na abang dalaga,  
galin kayang luha ng makakikita  
ang di aakaing bumalong sa mata?

Di naman mangyaring mabig-yan ng ganti  
palibhasa'y isang dakilang principe,  
anopa't wala nang anomang nangyari  
kung kahima't labag sa utos ng Ley.

Babaeng pinatay sa Novelang sulit  
ay kusang nabuhay sa dunong ng Langit  
at muling naugpong pinutol na liig  
napadpad sa ibang reino't dalampasig.

Kagandahang palad natagpo pagdaka  
ng isang lalaking namamalakaya  
namangha ang boong pagkatawo niya  
at sinapantahang diwa'y taga gloria.

Wika sa sarili mahaba nang araw  
ang dito sa mundo'y aking pagkatahan  
ay walang ganitong dilag kagandahan  
aywan kung mayroon sa langit na bayan.

Pagdaka'y binati ng ganitong sabi:  
Tabi sa dangal mo mahal na babae,  
ikaw baga'y sino't anong layon dini  
sa ganitong oras at lalim ng gab?

—Huag maguing sawi ang aking panugon  
sa kamahalan mo mamang tumatanong,  
pinagmulan ko po'y hindi mapagnoy  
gayon din ang aking dito'y pagkatuntong.

Kabuhayang yari di ko mapag-lirip  
na diwa'y nagbuhat sa dunong ng langit  
pinagmulang baya'y di po maisulit  
at ngayon pa lamang ako nagka isip.

Kaya ikaw na po ang siyang báhala  
na dini sa abang búhay ko'y magpala;  
ituring na anak sa pagaanduka  
at kikilanlin kang amang nagkalinga.

Kung gayo'y halina anang nakapulot  
nguni'y namamanghâ ang sa tawong loob,  
pagdating sa bahay ay pinapagscoot  
ng damit na tuyó ang anak ni Venus.

At isinalita sa asawang hirang  
yaong pagkakuhang mahiwagang bagay,  
sabihin ang tua't dí na ibig lisan  
ng dalawang mata yaong kagandahan.

Nagsasama na ngang bilang din sa anak  
at magulang namán ang gawang pagtupád  
di ko pagaanhin dumating ang oras  
lihim ng Lumikha'y kusang mapatanyag.

Mag-asawang hari ay sa pagpapacial  
sa lansangang yao'y manáng naparaan  
dilág ng napulot ano'y nang mátanaw  
ang matuling takbo ay pinapaghintay.

Sa carrosa ay biglang umibís  
at sa maralitang bahay ay pumanhík  
ang kapangyariha'y hindi na nagamit  
ang puso'y nabaghán sa himalang dikít.

Ang mahal na hari tumanong pagdaka  
—ito бага'y anak ninyong mag-asawa?  
sagot ng tinanong—dekilang Monarka  
iyan po'y pulut ko lamang sa aplaya.

Na di ko mawari magpahanga ngayon,  
kabuhayan niya, haring panginoon,  
pagka't kailan mang kunang kó ng tanong  
sabing talinghaga ang itinutugon.

—Kun gayon—ang sagot ng Sakramajestad sa kalak-han nila'y paumanhing gawad kami na ang inyong loobing mag-ingat at siyá ay aming paparahing anak.

—Oo po hari ko—ang panagot namin at sinong tatangui sa magandang hiling, mabigat bigat man na kung sa dadalhin ang atang mo'y pilit naming papasanin.

Huag lamang haring ibintang ng dibdib na parang gusto na naming siya'y malís. Mahal na babae tanto mo na't batid itong sa Monarkang ipinamamanhik.

Sagot ng dalaga'y—may dí pangyayari ang hindi pagayo'y lapastangang tanguí ang damdam ng puso'y di na nakaganti sa anduka ninyo at pagkakandili.

—Huag panimdimin at laking ligaya niyaring aming loob ang mápabunyí ka sa kandiling ingat ng ating Monarka bakit walang anak ang mahal na Reyna.

—Magaganap na po oh Sakramajestad ang hiling ng pusô—Maraming salamat babae'y kinawit ng Reyna at kagyat isasa-agapay ng kaniyang lakad.

—Sumandaling hintay—ang ipinagsulit sa kamay ni ama muna ay bahalik gayondin sa aking inang nagtankilik ipaalam na't kayo'y ingatan ng Langit!

Naghiwalay na ngang luha'y nalalaglag nitong maiiwa't magtatamong palad ang mata ng Reyna sa laki ng galak di na ibig lisan ang himalang dilág.

Yaon na't tinungo ang Palacio real  
kapagdating doo'y agad binihisan  
ng damit na piling dí sangkap ang dangal  
ang kahalimbawa'y bitwing sumilang.

Sa kinabukasan hari'y nagpalakad  
ng utos na gawing pilit ang pagtupad  
na ang magsabing hindi niya anak  
ay paakasahang buhay ang katapát.

Nagpatabas nanga ng damit princesa  
pinili ang kayong lalong mahalagá  
at kapagkayari'y ipinasuot na  
walang dí hahanga sa himalang ganda.

Nang princesa na nga siyang tinatanghal  
sa sakop na Reyno ng nagtatangkakal,  
bilis ng balita ay nangagliparan  
sa iba't isa pang mga kaharian.

Sigaw ng balita'y ano't nániniig  
ang napapanahon sa nasang pag-ibig?  
naroon ang ganda na sukat sa titig  
ay magsisilayas ang lahat ng sákit.

Bubugtong na anak ang himalang ganda  
ng nagkakandiling haring magasawa  
nang ito'y márinig ay nagsigayak na  
ang nangaguusig sa nasang pagsinta.

May principe't duque, konde't kaballeros  
na ang pagsasadya'y tungkol sa pag-irog  
at gayon din namang balita'y umabot  
sa takál na tawong principe'ng pumugot.

Nagsadya rin naman na paris ng iba  
na ang tinutungo'y ang nasang pagsinta  
dilag ng princesa'y ng tamaang matá  
tumapon ang isip sampong kalulwa.

Anopa't sinupil nabihag ang dibdib  
niyaong kay Kupidong dahás ng pag-ibig  
nang mag-uling loob nagsakdal sa langit  
na panungtang palad ang magandang nais.

Nangag-alay na nga ng sinta't pagluhog  
ang nagsipagsadyá sa nasang pag-irog  
kung anong hiwagang kaloob ng Dios  
ang naguing asawa'y ang principeng nugot.

Ihahangang dito ang kináhinatnán  
ng abang dalagang kinitlán ng búhay  
gang principe baga'y kung kaya nákasal  
ay talagang utos niyong kapalaran?

—Ano pang liwanag iyong hahanapin  
sa nangyaring yaon, kapatid na guilw,  
pinutlán ng liig muling nabuhay rin  
palibhasa'y siyang kapalarang taning.

—Tama ang sabi mong nakasal kapatid  
pagka't princesa nang kagandahang labis  
kun ang dating búhay siyang ipipilit  
makalilibo ma'y puputlan ng liig.

At may pangyayari kayang makasal pa  
sa lalaking buháy babaeng patáy na  
dito'y liwanagan mo nga sa dalawa  
sa palad at gusto'y sinong nangauna?

Itong kapalaran kung pag-iisipin  
ay parang busabus ng pag-ibig natin  
at walang sarili siyang mararating  
kun ang haring gusto'y siyang tumitiguil.

Aywan sa ibang nangyayaring bagay  
kung tungkol sa ating daláng kabuhayan  
may dukhang nanakyat sa luklukang dangál  
at may darakilang naaabá naman.

Yaong sinasabing nangapapahamak,  
nalunod ó kayâ natuka ng ahas  
baka naroroon ang kaya ng lakas  
niyaong sinasabing naghaharing palad.

Nguni't sa kalakhan ng haring-pag-irog  
itong kapalaran ay naninikluhod  
palibhasa'y siya'y nahahandang lingkod  
sa anomang bagay na ipag-u-utos.

—Makáhahalekhak kung pagwawariin  
ang katuwiran mong panagot sa akin,  
¿diyata't sa dahás ng haring pag-guiliw  
itong kapalara'y talagang alipin?

Huag kang palulong irog na kapatid  
sa dunong ng iyong námamaling isip  
itandâ sa noó at saka sa dibdib  
na ang kapalaran ay hulog ng Langit.

Dí бага ang mga alay na pagluhog  
sa isang babae'y halál ng pag-irog  
ay bakit kung hindi bigyang pahintulot  
tátangá na lamang at maghihimutok.

¿Nasaan ang dahás ng haring pag-ibig  
na sinasabi mo guiliw kong kapatid?  
ang kapangyariha'y bakit dí magamit  
na ang sumasamong pagsinta'y ipilit.

Asal ng pag-ibig ang sumamosamò  
at sa sinisinta'y maghandóg ng suyò  
tuíng máhaharáp sa langit ng puso'y  
nagpapakilala ng pamimintuhò.

Yaon man at hindi ipagkakaloob  
ng palad ay sayang ang puhunang pagod,  
ihahangang dito kapatid na irog,  
¿may matuid ka pa bagang isasagót?

—Tamà ang tugon mo kung didingin lamang nguni't mayroon pang náninirang bágay pagka't ang pinilit na ikinakasal nulo sa kastila kung ito'y panganlan.

Sapagka't ang dilág ng pag-aasawa buhat sa kasundo ng pusong dalawa kailan ma't hindi ganáp ang pagsinta walang kabuluhan yaong pagsasama.

Bakit nang panahong tayo'y maligalig na ang pilipino'y magsipanghimags k ay daming uabaeng nákasal sa pilit gyaon kaya'y palad na hulog ng Langit?

Hinayang sa buhay ang sanhing pag-amin takot sa maikling pamatay at baril, ngayon ang tanong ko, kapatid na guiliw gyaon kaya'y utos ng palad na taning?

—Di kung gayon pala itong kapalaran ay walang sariling lakás na sinimpan, sapagka't kung hindi huminging tulongan ng baril ay hindi mapilit ang ayaw.

At bukod sa rito kapatid na irog kun ang kapalara'y sa langit na hulog di na mangyayaring daanin sa takot pagka't yao'y bawal ng banál na utos.

Kaya't anhin ko mang tanungin ang isip nag-áalanganing mayag yaring dibdib na pawawalan mong lakás ang pag-ibig at ang kapalara'y siyang mananaig.

Ang bagay na ito'y sinabi ko lamang di ka pinipilit na ako'y ayunan, nguni't sa sarili ng bait na simpan ikaw ang bahalang sa wasto'y magtimbang.

At kung matagpuan ng pantás mong isip  
ang kalulunduan ng hustong matuwid  
hinahong papayag naman yaring dibdib  
at tatangapin mo ang aking panalig.

Bakit sa kanitang pagsasamang ganáp  
itong pagtatalo'y hindi nárarapat  
at saka himalang makita ng lakás  
ng lampá tang isip ang ililiwanag.

Itong atin ngayong pagsasalitaan  
ng balabalaking magunitang bagay  
ay para na bagang isang pagsasanay  
ng tumulín tulín isip tang mabagal.

—Oo nga Marcela't yaon ang matuid  
hangang nabubuhay sa silong ng langit,  
ang tawo'y piliting dumunong ang isip  
sa kapanahuna'y nang hindi maguipít.

Mag-aral ng mga wastong pangungusap  
na makakalugdan ng kinakaharap  
at yaon ay isang karangalang sangkap  
ng tao kahima't nagmula sa hamak.

At ang pangungusap ay ipapanahon  
huwag sa bala nang salita'y tutugón  
at ang pagnanasang panganlang marunong  
lalong nagbabansag niyaong pagkagungong.

Ang palalong anio't kilos na magaslaw  
sa gawa at wika'y páilag-ilagan  
sa isip na puri hindi t kapintasan  
ang maguiguing bunga't tubong pakinabang.

Ang pagmamabini't bala't kayong hinhin  
kung dí katutubo naman ay wala ring  
aantaing puri't bagkus babalutin  
sa pula't siphayô ng dilang matabil.



Sampo pa ng amat inang nag-anduka'y  
masasabisabing diwa'y nagpabaya,  
at kung hindi gayo'y di naman lálalâ  
ang lumaguing gawing may katalong pula.

Ihahangang dito't dapat ding mag-ingat.  
ang tawo sa pulang nagsalasalabat  
kung di man maluklok sa dakilang taas  
ay huag mangyaring malunod sa libák.

—Ang lahat mong saysay Dalmaciang kapatid  
ay dapat ilimbag sa ubod ng dibdib,  
nguni't ang hiling ko'y huag ipagkait  
naganti mo na ba ang padalang titik?

—Hindi nga Marcela; ito'y isang bagay  
na isasanguni sa pagmamahalan  
at ipahahayag tanáng kalihiman  
niyaring aking dibdib mula niyaong araw.

Maniwala ka kapatid na guiliw  
ang liham na yao'y mula nang tangapin  
salamat at di mo palá nápapansin  
na yaring isip ko'y nagpaparang halíng.

Sa alay na sintá ni Constancio't hibik  
nag-aalanganin sana yaring dibdib,  
nguni't sa pasiyang hatol ng pag-ibig  
di dapat itakuil ang sa pusong langit.

Kaya buhat na nga ng aking tangapin  
ang padalang liham, kapatid na guiliw,  
parang binabaka ang gulong panimdim  
na di matutuhan ang dapat kong gawin.

Ito'y hindi sana dapat pamalayan  
sa kahit kangino at kahalayhalay  
na tayong babayi pala'y nagdaramdam  
ng matinding dusa sa nagugustuhan.

Nguni't sa malinis na pagkakatali  
ng kanitang puso'y nuha't ang bighani  
na pagtapatan ka't yaring dalamhati  
ng tungkol sa sinta'y magkalualhati.

Upanding sa iyong magagandang hatol  
ligalig ng aking puso'y huminahon  
sa padalang sulat Cela'y nagtatanong  
kung ano ang dapat na maguing panugon.

—Diyán sa hiling mo guiliw na kapatid  
na hatulan kita ng itatahimik,  
walang magagawa yaring aking isip  
kun ang iyong puso'y supil ng pag-ibig.

Sapagka't ang dahás ng Haring pag-irog  
ay dí gumagalang at dí natatakot,  
walang katuirang ina-alinsunod  
liban sa ang nasa lamang ang masunod.

Pagpayuhan ka mán ng lalong matuid  
ang kalihiman mo'y hindi rin didinig  
lunas na pagpulhan ng itatahimik  
ay ang katutubong sarili mong bait.

At yaon ang siyang makapag titimbang  
ng lalong marapat sa kahihinatnan  
yayamang sapagka't dati mo rin alam  
ang lakad ng mundo't panahong niniral.

Iyong magagawa boong pag-iingat  
kung may panimdim kang puri'y mapahamak  
at ang kabaita'y siyang naghahawak  
sa ikasasawi ng dáratning palad.

Ang sinomang tawo'y pagka't sinangkapan  
ng tatlong sandatang talagang panglaban  
kailan ma't ito'y di mo bibitiwan  
ay dapat umasang ipagtatagumpay.

Sapagka't kung ito'y di mo isasalong  
sa digma ng mundong laláng ng panahon.  
ay pakaasahan na ipagtatangol  
ikaw sa lahat nang sakuna't lingatong.

Huag maniwala ang lapok na loob  
na tayong link-ha'y may talagang signos.  
sapagka't ang tawo'y kung sumasa-Dios  
ay walang pangamba't hindi matatagkot.

Kaya nga sa awa niyaong Matankilik  
na nagpakaduk-ha ay deon manalig  
na pagpinagtibay ang sariling bait  
walang magagawa ang lilong panganib.

Tungkol sa hiling mong kita'y pagpayuhang  
sukat hangang dito ang kaya ko lamang  
at ang dakong huli ng káhihinatnán  
ay wala sa aki't ikaw ang may tangan.

Kaya hangang dito't asahang kalakip  
sa makakayanan yaring aking dibdib  
nguni't sa tadhana ng Haring pag-ibig  
sarilinan tayo ng mapagsasapit.

—Salamat sa iyo kapatid na guiliw  
sa mga hatol mong palagay sa akin,  
na ang kabaitan ang papagtibain  
at ang pag-aadya ng Nakop sa atin.

Paalam na muna ako at aalis  
si ama't si ina'y nang dí nai-inip  
kung walang dahila'y asahang babalik  
sa araw ng bukas guiliw kong kapatid.

—Adios Dalmacia't kung walang hilahil  
inaantay kita sa araw mong taning  
at ang taguri ko'y huag lilimutin  
ang pagmamahalan magpahangang libing.

## Ang pag babalik ni Dalmacia

### Ikaapat na pankat

Narito na ako kapatid na irog  
ganong buhay ninyo kagabing pagtulog?  
—nagdaang payapa na awa ng Dios  
kayo nama'y ano? Wala ring sigalót.

Nguni't nang matapos kami ng agahan  
tumangap na mulí ng padalang liham  
na ang hinihiling niyaong karaingán  
ang magandang nasa'y bigyang kasagutan.

Narito Marcela at iyong abutin  
itong ikalawang hatid na pagdaing  
—Dalmacia'y oo nga't aking babasahin  
na kung anong bagay ang sa pusong hiling.

*Ang pagbasa ni Marcela sa pangalawang  
hibik ni Constancio tungkol sa pag-ibig.*

Nunulí na naman ang aking paghibik  
sa mga yapak mo, Poon ng pag-ibig,  
na sa karainga'y huag ipagkait  
ang lunas na awa sa may dusang dibdib.

Nguni't kung hindi mo naman maaatim  
ang lungoy ng puso't bawal ng pag-amin  
ay wala nang buhay na dapat ituring  
at parang himbing na sa hanturgang libing.

Kaya kung sakali't nagaalangán man  
sa hiling ng aking nagdurusang buhay  
mabighani ka ring iyong pagpayuhan  
ang sariling puso't magtaglay ng hambal.

At nang sa dalita'y upang makahugot  
ang nálulugami sa nasang pag-irog  
ipagkatiwala sa hihinting sagót  
ang iguiguinhawa niyaring abang lingkod.

Ihahangang dito at pakahihintin  
ang tapát mong hatol sa alay kong daing,  
lakip ang kumusta't sa kayang pupulhin  
ay natatalagang lingkod hangang libing.

*Sagót ni Marcela.*

---

Dalmaciang kapatid ang ganitong liham  
ay pabangóng suob sa tinataghuyan,  
upáng sa amuki ng pagsintang alay  
ang pinto ng iyong bighani'y mabuksan.

Ngayon ang tanong ko kapatid na guiliw  
huag paglihimat magtapat sa akin  
tungkol kay Constanciong handog na pagdaing  
may palad na бага siyang tatangapin?

—Sa tanong mo Cela'y bakit maglílingid  
ang pagsasama ta'y higit sa kapatid  
ang katotohana'y siyang isusulit  
bagay sa binatang dulot na pag-ibig.

Nang nakararaang di pa tinatangap  
ang ina-asam kong pahatid na sulat  
ay nau-una na siyang nakalimbag  
sa lihim ng aking katauhang bihag.

At nang tangapin ko ang sinugong titik  
walang paglulanan ng tuá ang dibdib,  
gayon man ay aking pinátipid tipid  
na dí nagpamalay sa tawong naghatid.

Anopa't ang aking ligayang tinangap  
sa pagdating niyaong sinugong kalatas  
di lubhang nalaon ay nangagsilipas  
at ang humalili ligalig at sindak.

Uang nagunita't sanhíng nakahadlang  
ay ang pagka habág sa mga magulang  
lapastangang anak ang di na tumanaw  
sa hirap dálita nilang pinuhunan.

Bukod pa sa rito'y nang mag-isip-isip  
alab ng gusto ko'y nasubhán ng lamig  
dahil sa balitang aking nadidingig  
na ang tawong yao'y lahing mababagsík.

Bulong ng himaton kahit may asawa  
sa ibang babayi ay nakikisama  
dahil dito'y siyang niguil umantala  
sa malagong tubo ng aking pagsinta.

Yao'y siyang sanhi't bilang na pumiguil  
sa náunang siglá ng aking pag-guiliw,  
nguni't maniwalang sumasalisi rin  
sa buntong gunita na siya'y tangapin.

Ngayon ko natantong ganong tinding bigat  
iwaksi ang sintang diwa'y may kamandag?  
na nananalatay sa lahat ng ugat  
kaya't di mangyaring biglaing makatkat.

Nguni paghinahon bulág na pag-ibig  
idila't ang iyong nadidimlang isip  
kung papatulan mo ang hiling ng dibdib  
ay mahuhulog ka sa madlang panganib.

Kung naroroon na sa kamay ng sukab  
lahing mapaglilo sa asawang liyag  
di ang kailangang gagawing pang lunas  
sa hapdi ng puso'y luhang tatagaktak.

Piguil aking loob at alalahanin  
ang pagaasawa'y matinding dadalhin  
kung makatagpo ka ng ugaling taksil  
magsisi ma'y huli't walang marayating.

Lalo na't lalaking laguing mapagbintang  
sa di guinagawa'y paghihinalaan,  
marahil ay di na panghihinayangan  
sa ikadadalí ang lapck mong buhay.

Lalagui ka na nga sa tinaghoy-taghoy  
magsisi ma'y huli't wala nang panahon,  
anopa't kaya ka lamang huminahon  
kung maguing bangkay na't katawa'y maburok.

Ito'y karaniwang aking namamalas  
sa mga babaying sinasamang palad  
siyang umi-iguib, kilik pa ang anak  
na di pinapansin ng lalaking tamád.

Sampong pagkabúhay na ipagtatawid  
ng asawa't mga bunga ng pag-ibig  
ang tungkuling yaon ay wala sa isip  
at di nahihiya sa nakamamasid.

Ang lahat ng ito'y dapat isadili  
na kahihinatnan ng isang babayi  
kung naroroon na'y walang mangyayari  
liban sa managhoy ang iyong sarili.

Sa lahat ng ito katawan ko'y bakit  
hangang may panaho'y milag sa panganib  
kun katungkulan man ang gawang umibig  
huag kabibiglá at mag-isip-isip.

Yaong kay Constanciong alay na pag-irog  
na naguing bunga ng aking pagtulog  
pakapipiliting iwaksi sa loob  
at sa dalamhati nang hindi mahulog.

Sapagka't kung siya'y magmana ng asal  
sa mga linahi niyang p nagmulan  
na nangbabayi at ang katungkulan  
sa sintang asawa'y ipinamimigay.

Di kung magkagayo'y alin pa ang háyap  
niyaong dalamhati ang hindi susugat  
dini sa puso ko at ggaanong antak  
ang ipagdaramdam ng saliwang palad?

Ang lalong marapat ako'y mamayapa  
sa piling ni ama't inang nag-andukha  
at doon na hihintin ang laáng tadhana  
niyaong kamatayang pagpanaw sa lupa.

Sa madlang pasiýa niyaring aking dibdib  
nararapat kaya Marcelang kapatid?

—Oo ang sagot ko't hindi nalilibis  
kung may kapalarang matay sa tahimik.

Nguni't itong tawo'y kung talagang laang  
sa pag-aasawa'y mapa-abáng buhay,  
ang mata ng isip ay nabubulagan  
sa masamang palad niyang káraratnan.

Masdan mo Dalmacia't siyáng nangyayari  
sa mapapasawing paris tang babayi,  
kahima't mayaman at anak sa puri  
sa sinta ng duk-ha ay napahuhuli.

Kaya ang sinoma'y bulaan ang bait  
at ang matalinong mga pag-iisip  
supil ng tadhana't hindi magagamit  
ang siya'y umilag sa maling pag-ibig.

Daming pasalamat ang itinutungkol  
sa kabaitan mong taglay ang hinahon  
at dí nabalínong puso mo'y lumusong  
sa hiling ng mundo't udyók ng panahon.



Sapagka't ang isang babaeng gaya ta  
ay talagang laán sa pagaasawa,  
may napapa anyong palad sa guinhawa  
bukod sa sariling kanlong ng ligaya.

Bakit ang madalás ay ang pagkukulang  
ng isang babayi sa asawang hirang,  
anaki ang ibig ay siyang magtangan  
ng ipangyayari sa lahat ng bagay.

At pagbibintangán ang asawang liyag  
ng dí guinagawa at wala sa hagam  
ito'y di lulubay ng tinalak-talák  
hangál na babaying walang puring ingat.

May dí pagkabugnot at bigyan ng tabig  
kung nagupunó na sa di gawing galit,  
yao'y hindi buhat sa talagang bagsik  
kundí sa babaying samang bukas bibig.

Halihalimbawang may katotohanan  
ang bikig ng pusong ipinagbibintang  
yao'y hindi dapat ipagmaka-ingáy  
paka't sa asawang panganib ng búhay.

Kaya sino ko man irog na kapatid  
na may asawa nang pinakai-ibig  
kung may panibugho ka mang ini-isip  
ay pakabalutin sa lihim ng dibdib.

Lalo t may asawa ang patatamaan  
sa kutóg ng iyong maling pagbibintang,  
dí parang ikaw na ang nagpapatnubay  
sa ikadadali niyaong kamatayan.

Kung mapanganyaya ang asawang liyag  
ng dahil sa iyong dilang talipandas  
gmaagaw mo pa kayang máligtas  
ang nása kamay na ng pagka-pahamak?

Kaya ang payo ko mga guiniguliw  
sa ubod ng puso'y itandang magaling  
kung mayroon ka mang panibugho'y tipdim  
at saka ihibik sa oras na lihim.

Na ang sabihin mo'y kulang ang ihalik  
sa bakas ng yapak, asawa kong ibig  
tungkol sa anyo mong aking námamasid  
ngayon ang luhog ko'y limutin sa isip.

Alalahanin mo, asawa kong hirang  
na ako ang iyong katagni ng búhay  
ikaw ang sinta ko't kaisang katawán  
kun ang pagsasama'y hindi durungisan.

Kaya ako'y huag sanang pagliluhin,  
pagka't ang damdam ko'y karamdaman mo rin  
sa bawal kong ito't di ka papip'guil  
magkukusa akong lulusong ng libing.

At dí makakayang itagal ng dibdib  
ang párusang ako'y dayain ng ibig  
at ito ang siyang sanhing maghahatid  
nivarang abang búhay sa hantungang guhit.

At ang pagkukulang ng iyong pagtingin  
sa mga anak ta'y ang ihahabilin  
ang buntong hininga, at anong gagawin  
sinásamang palad sa amang nag-ankin.

Masdan natin dito kung hindi lalambot  
sa pusô ng isang kasing ini-irog  
at mabibighaning mahambal ang loob  
lalo't ang luhà mo'y makitang nanagos.

Kung sakasakali't hindi rin didingig  
sa mga taghoy mo't malunos na hibik,  
sukat sa magbata't idaing sa Langit  
na siya'y loobing magbago ng isip.

Iligtas sa madlang abang na pangamba  
ang kasing irog mong supíl ng anyaya  
ng mundo't ilagay ang boong pag-asa  
sa dunong na lihim ng Lumik-hang Amá.

At kung бага siya'y dí rin magbabago  
ng pagkálugami sa daya ng mundo  
ang loob mo'y huag namang mabubuyó  
na sa dalamhati gumanting maglilo.

Ang isang lalaki kahima't maglihim  
dilág ng asawa'y lalong nagniningning,  
nguni't kung babayi ang siyang magtaksíl  
ang abang lalaki'y nagmumuk-hang halíng.

Titigas ang buhók at magbabalita  
ang kulay at anyong siya'y nadadayâ  
sa pagkakagayo'y dí ka naman kaya  
nagdadalang habág, babaying kuhila?

Dilidilihin mo't ikaw ang may tangan  
niyaong mahalagang putong na kinamtan,  
na kapag nabagsak ito at pinugay  
ay parang gumiba ng isang Sambahan.

Salamat na lamang kapatid na kasi  
kung bigyang panahong magawa ang sisi  
kamatayan nati'y hindi nagsasabi  
ng araw at oras na ipanagyayari.

At magandang pala, irog na kapatid  
kung pahahatdan kang babalá ng Langit  
at bigyang panahon na makapaglinis  
upanding magtamo ng bayang tahimik.

Ihahangang dito't ako ma'y hindi pa  
talastas ang dako ng maguiguing hanga  
kung may kapalaran sa pag-aasawa  
ó hangang tumanda sa pagka dalaga.

*Ang pagsagót sa sulat ni Constancio.*

—Maalaala ko Marcelang kapatid  
yaong kay Constanciong sulat na pahatid  
ating bigyang sagót na ang ninanais  
ay wala nang daang ipagkaka langit.

—Oo nga Dalmacia't siyang katuiran  
na dapat gantihin ang padalang liham,  
muha ka ng papel na pagsusulatan  
na ang ninanasa ay wala nang daan.

—Narito Marcela't sa kamay ko'y abót  
ang pagsusulatan ng aking panagót,  
na ang sasabihin ay walin sa loob  
yaong pinupulong awa sa pag-irog.

—Dalmacia kung gayo'y tangniang pangguhit  
at u-ulatan ka ng lampa kong isip  
na ang balang malí huag itititik  
hanapin ang hindi damdamin ng dibdib.

*Ang panagót ni Dalmacia kay Constancio.*

Náhuling pagsinta sa kapanahunan  
nang ako'y wala pang naguiguing katipán  
kung ngayo'y wala nang sukat maguing daan  
pagka't sa puso ko ay may nagtatangan.

Hindi'ta taga rito't lalaking mabait  
ang tinatahana'y bayang matahimik  
pakumbabang loob at mapagtankilik  
sa kapanahuna'y gagawin ang bagsík.

Kaya huag mo pong ipagdalang lunos ang nabigong palad sa nasang pag-irog di na mangyayaring ako'y makahagpos sa kamay ng aking kasing nagkukupkop.

Sukat hangang dito't sa tadhanang laan ng Langit, ang tawo ay doon lumagay, yaon ang payo ko't ang taguring jay! tayo'y manatili sa payapang búhay.

\* \*  
\*

Sa lahat ng aking inilagdag titik ganong palagay mo Dalmaciang kapatid? —sa aki'y husto na't hindi náhlíhís tungkol kay Constanciong alay na pag-ibig.

Cela'y tik'lupin mo't sa pagbabalutan lalagyan ng guhit ang aking pangalan tandáng maguing saksing ako ang may bigay sa tawong nagdalá ng panugong liham.

*Ang pag owí ni Dalmacia.*

Oowí na ako't ang sadyang liwanag nitong boong mundo'y ibig nang lumipas —Oo nga Dalmacia't kung may búhay lakás inaanatay kita sa araw ng bukas.



Ang pagbabalik ni Dalmacia sa tipáng  
kinabukasan.

### **Ikalimang Pankat.**

Malayo layo pa itong dumarating  
ay nakangiti na ang magandang ngipin  
itong dináratnan naman ay gayon ding  
isinasalubong ang mukhang may alíw.

Nagyakap na silang puspus ng ligaya  
parang pusong sabík sa dí pagkikita,  
sa pagkakayapcs nang magkabitaw na  
kay Dalmacia'y nugnós ang buntonghininga.

Tanong ni Marcela'y—¿Ano ang dahilan  
may karamdaman ka bagang tinataglay?  
—Oo nga't kung bakit laguing dinadalaw  
yaring aking loob niyaong agam-agam.

Sa tuitui na'y laguing náí-isip  
ang mga babalang pahatid ng Langit  
kung anot ang aking luha'y naguiguilid  
at napapanimdim ang huling sasapit.

Kung kahima't kita'y nagsasalitaan  
ng balabalaking maisipang bagay  
dí mo lamang pausíng madalás magdaan  
sa aking gunita ang kutóg ng lumbay.

Ang lahat ng ito'y kung aking damdamin  
ay wala sa loob at dí pinapansin  
ng ibang kapua't nagpapakahimbing  
sa layaw ng mundong lubhang sinungaling.

—¿Ano ano namán kapatid na hirang  
ang napapansin mo sa mundong kásaman?  
—liban sa dí gayon daming nagnanakaw  
ang ari ng iba'y lupiguit ma-agaw.

At sa pagsasamang tanging mahalaga  
nagsisipaglilo ang isa at isa  
at kung magkáminsan ay pinapatay pa  
ang nakapipiguil sa masamang pita.

Ang pananaghili at ang pagkainguit  
sa palad ng iba'y aewan kung bakit  
naguiguing bisoól at matinding bikíg  
sa puso ng dugong may linahing inip.

Ipinaghihigpit ng hingang payapa  
yaong pagtatamóng palad ng kapua  
at pangugugulan ng ikasisira  
niyaong pangimbulo ng asal kuhila.

At saka kung aking pagkurukuruin  
ang dí pagka bangon, Inang Bayan natin  
imbót sa pagyaman, ang nakapipiguil,  
ng kuhilang anák na walang pagtingin.

Ipinagbibili sa hindi halaga  
ang mga damdaming pag-irog sa Iná  
may asal Galalón ¿ano't hindi ka pa  
tambingán ng walang habag na parusa?

Sa ugaling gayon may dí pagka poot  
yaong nanunungong mahabaguing Dios  
sa yaman at puring hamak inu-ubos  
ang pagsusumak't nila't paglilingkod.

Ito ang masaklap ngayong umi-iral  
na inu-ugali ng maraming bayan  
hindí magkáisa niyaong kalooban  
at ang naghahari ang pag-iingutan.

Iba'y nagsasabing mag-atang ng bigát  
ay dí naman kaya ng lampang balikát,  
anopa't kung бага másunod ang hangad  
parusa ng baya't damdaming pahirap.

Ay manong damdamín ang aming pagluhog  
pilitin ang tayo'y magka isang loob  
upanding sakaling siyáng makalagót  
sa tali ng ating Inang nalulunos.

Hangang dito Cela't may dí pag sisikip  
ang poót sa tawo, ng Amá sa Langit  
linalapastangan ang Santong matuid  
at ang kaliluhan ang nasang manaig.

—¿Ano ano namán sintang kapatid ko  
ang mga babaláng dí pansin ng mundo?  
—Unang unang aking tuturan sa iyo  
kólerang nunuksá sa búhay ng tawo.

At ang ikalawa'y ang pagk kamatay  
ng kawaksing hayop sa ikabubuhay,  
baboy, mga manók, at iba pang bagay  
saka ang luluksóng salot sa halaman.

Na diwa'y sa boong lupang Filipinas  
ang hayop na ito ay lumalaganap  
halamang dapuan sa boong magdamag  
tapós na ang pagod at puhunang pilak.

Napanganyaya na't wala nang hihintin  
tulad sa nagdaang sinirang pananim  
ang pag-asa'y lubos na may aanihin  
at nang naglalaman ay saka kinitil.

Sa liliwang bagay na aking tinuran  
ika-anim yaóng away na nagdaan  
ito kaya'y hindi dapat ipagnilay  
ng tawo't isipin huling kararatnán?



Ang Dios ay Amá ng Santong matuid  
na dí mangyayaring gumawa ng libís,  
ang lahat ng ito'y dapat isa-isip  
at alálahanin ang huling sasapit.

Kaya nga sa tanáng kapatid na hirang  
ito'y dí pag-unang bait at pagaral,  
pilitin na nating iwaksi't talikdan  
ang inu-galing hindi karampatan.

Ang pananaghili at ang pag-iimbót  
sa ari ng ibang namuhunang pagod,  
huag pagpilitang ikaw ang mag-impok  
at kahalay halay sa tawo't sa Dios

Alalahanin mong may sangkap ka naman  
na ipagwawari sa lahat ng bagay  
may puring sariling dapat pag-ingatan  
at ang malalait na mga magulang.

Pagkat kun ang tawo'y napapakasamá  
na parang bulág na ang pagaakala  
dalangin ng lahi ay ganong mabiglá  
ang kaniyang búhay na kahiya-hiya?

Na dahil sa puri ng mirulang buhat  
ay nangadadamay sa pula't paglibák  
kaya hinihiling ng lahat ng anak  
na siya sa mundo'y huag nang magluát.

Kun ang kahinlurang dapat magmasakit  
ay nananalanging búhay ay maligpit  
ang di kamag-anak ganong máisip  
di ang daganán na ng sangmundong sákit?

At saka ang tawo'y kundí tatalikdan  
ang pagkakasalang kinadudumugan  
ay hindi malayo na tayo'y pahatdan  
ng parusang walang dalang pakundangan.

Kaya nga sa tanóng guiliw na kapatid  
ito'y hindi naman pangungunang bait  
pilitin na nating limutin sa isip  
ang lahat ng gawang laban sa matuid.

Mangag-sipag-sisi't gugulin ang luha  
ng paghinging tawad sa Poong Maygawa  
at magsi-pangakong di na magnanasa  
sa linaguing gawing asal na masamá.

Upanding kung бага't mak ta ng Dios  
na tayong lahat na'y nagbabagong loob,  
mahabág at di na ituloy ang poót  
bagsik ng parusang kakilakilabot.

Kaya sino kamang nagpapakahimbing  
sa layaw ng mundo, dibdib mo'y pukawin  
hangang may panahon ay samantalain  
yaong pagsisising lubos na taimtim.

Yamañg talastas mo na ang ating búhay  
ay hindi lalagui sa lupang ibabaw  
at may takdang guhit yaong kamatayan  
na pagtuntong doo'y tapós na ang layaw.

Kaluluwa natin ay pilit haharap  
sa handang Hukoman na sakdal ng taas  
at uusisain ang lahat at lahat  
inasal sa mundo't gawang hindi tapát.

Gahanip mong sala'y walang mákakanlong  
sa tunog ng Juez na tatanong doon  
at kung malining na'y gagawin ang hatol  
sa dalawang bagay na maguiguing ukol.

At sa pagdurusa'y kung doon mahulog  
ang maguing pasiyá ng hatol ng Dios,  
yaon ang dálitang kákilakilabot  
at hirap na walang hangang pagkatapos.

Kaya mabuti rin ang may binhing hasík  
buddod na pananím sa bayan ng Langit  
upanding mag-ani ng linamnam tamís  
at kaligayahang walang kahulilip.

Ang Imperiong yao'y hindi napapasok  
ng kahima't sino'y ng ligalig lungkot  
palibhasa'y bayan ng santas at santos  
na nangag-aalay ng puri sa Dios.

Doo'y walang gabí ang saad sa aklát  
wala namang araw, buang sumis kat  
ang kapangyarihan ng Dios na wagás  
ay labis sa madláng tanglaw na liwanag.

Naroon din nama't iyong mak-kita  
ang luklukang hayag ng Vírgen María  
alay ang maraming puri't pagsasayá  
ng mga Vírgenes sa payapang Gloria.

Ang ligayang yao'y walang pagkatapos  
walang pagkabago at lubos na lubos  
hindi paris dito na sa munting lugód  
dusang langkay langkay ang ganting kasunód.

Kaya nga ang dapat ay magsamantalá  
hangang may panaho'y talikdan ang sala  
at huag páwili sa tamis ng lasa  
nitong bungang mundo't may lihim na paklá.

Yao'y pawang daya't laláng na hikayat  
ng taga Averno, kaya nga ang dapat  
gamitin ang tatlong katutubong sangkap  
at ang kaluluwa'y nang dí mapahamak.

Kun ang lakas natin ay mapipipilan  
ay huminging tulong sa kapangyarihan  
ng Poong Lumkha, at dí papayagang  
masupil ng lilong digma ng kaaway.

Ating dalanginin ng taós sa dibdib  
yaong kamatayang sakdalan ng tamís  
kaluluwa nati'y nang upang magkamít  
niyaong Luwalhating walang kahulilip.

Sukat hangang dito, Marcela ang galáw  
ng mga pagpitás nitong lamang bayan,  
ang magandang suyò nawa'y ipatnubay  
ng may awang Langit hangang nabubuhay.

Ang ating harapin ay ang makatumbás  
sa ama at inang namuhunang hiras

—Oo nga Dalmacia at kung matutupad  
yao'y mamumunga ng magandang palad.

Nanatili nangang kanilang ilagan  
ang madláng paraya nitong kamunduhan  
at walang hinaráp kundi ang mag-alay  
ng magandang suyò sa mga magulang.



## ISÁNG TAGUBILIN.

Sa bakás ng yapak ng kadalagahan  
ang lumagdang isip nito'y nag-aalay  
ng munting gunita na kunang ulirán  
yaon kay Marcela't kay Dalmaciang búhay.

Kung бага sa isang Araw na sumikat  
ay dí nangulimlim ang pagliliwanag  
buhat sa mulâ pa ng pagkakalapat  
ng kanilang dibdib na parang sinukat.

Ang ali't alin mang datnán ng ligamgam  
ang sing-isang puso nila'y nagdaramdam  
gayón sa ligaya namang kinakamtan  
walang natatanging pagsasarilinan.

Kung sakasakali at may maling isip  
ang ali't alin mang sinsay sa matuid  
ay nasasansala at naihahatid  
hangang sa hantungan ng itatahimik.

Sila'y marurunong magbigay pitagan  
sa bala't bala nang dapat na igalang  
ito'y pakorona't putong na bargibang  
sa puri ng mga nagpalang magulang.

Maiingat silang magbalot sa lihim  
ng puring hindi pa panahong sayangin  
magagandang loob, marunong tumingin  
sa búhay ng duk hang dí gawing pansinin.

Nangag-aabuloy ng makayang habág  
sa kahit sinomang lugami sa hiras,  
hindi nabubuyó sa maling h kayat  
ng mapag anyayang isip sa pahamak.

Ang magyao't dito at makipanayam  
sa dí kaugali ay naguiguing bawal,  
lalo na't ang gawi ng makakararal  
ay manirang puri ng sa ibang búhay.

At kahit binaka ng Haring pag-ibig  
yaon kay Dalmaciang matibay na dibdib  
ay hindi nangyari na ipinalupig  
at ipinagtangól ng sariling bait.

Bilang naging kutâ ay ang pagninilay  
at ang pagka habág sa mga magulang,  
pinilit ang loob na makipaglaban  
sa dahas ng sinta nama'y nagtagumpay.

At ang nanatiling nasok sa panimdim  
sa kay Jesucristo ang puso'y ihain  
huag magasawa't baka ang sapitin  
ay ang dalamhati sa kakasamahin.

Sinabi kong ito'y dí naman paghadláng  
sa mga dalagang panahong niniral  
at ang matrimonio'y mahalagang bagay  
kung sakasakali't mapag-iingatan.

Yaón ang halamang habilin ni Cristo  
pinangagalingan ng tawo sa mundo  
diyan nagbubuhay ang Papa't Obispo  
Cardenal at saka ang mga Ministro.

Anopa't kung bagá mapag-iingatan  
ang pagk kalinga sa Santong halaman  
dito pa sa lupa'y pakikinabangan  
hangang sa lumipat ng payapang bayan.

Nguni't kun ang dahil ng pag-aasawa  
ng isang babayi sanhi sa anyaya  
ng mundo, at hindi bibigyang halagá  
ang pagmamahalan mahaga'y hindi na.

Kaya nga ó mga binibining hirang  
kayo sa sariling laguing magninilay  
at hingin sa Dios na paliwanagan  
kun ang inyong isip ay pinagdidimlan.

Muhang halimbawâ at kayo'y pumaris  
doon kay Dalmaciang dunong na mag-isip  
hindi nabighaning natol sa pag-ibig  
at ang alaala'y ang huling sasapit.

At kung mangyayari mahalintularan  
yaong kay Marcelang mapayapang buhay  
hindi nabighaning ang puso'y ibigay  
sa parayang hiling nitong kamunduhan.

Ang pagka dalaga'y hihiguit pa mandin  
sa apat na puong taón kung bilangin  
walang hinaharáp kundí ang maghain  
niyaong pagmamahal sa ináng nag-angkin.

Kaya nga ó mga binibining irog  
na ina-alayan niyaring paglilingkod  
maraming salamat kung ang iyong loob  
sa gandang anyaya'y magsi-alinsunod.

Yaong pagsasamang walang kasing tamís  
ni Marcela't saka ni Dalmaciang ibig  
kunang halimbawa't nang upang magkámit  
ng kaaya-ayang búhay na tahimik.

At kung magkagayo'y maraming salamat  
sa napapanahon ng PAMUMUKADKAD  
kahimanawari'y mag si PAMULAKLAK  
sabog kong tagurí ng MAGANDANG PALAD.

W A K A S

